

Paras air laut bakal meningkat 3 meter

Fenomena 'Lunar Perigee' atau Supermoon yang dijangka berlaku malam ini akan menambah lagi kenaikan paras air laut sekali gus memberi kesan kepada fenomena air pasang besar juga dijangka bermula hari ini.

Naib Presiden Jawatankuasa Saintifik Penyelidikan Antartika (SCAR), Prof Datuk Dr Azizan Abu Samah berkata, jika cuaca buruk terutama ribut, paras air laut akan meningkat dua hingga tiga meter.

"Pada tahun lalu, paras laut hanya 5.35 meter tetapi pada tahun ini dijangka 5.41 meter di Pelabuhan Klang.

"Bagaimanapun, jika terjadi ribut ia akan memberi kesan kepada fenomena air pasang ini di mana kenaikan air akan meningkat sehingga dua ke tiga meter," katanya ketika dihubungi, di sini semalam.

Sementara itu, Jabatan Bomba dan Penyelamat akan menjalankan pemantauan dan kawalan 24 jam di kawasan yang berpotensi untuk menghadapi banjir jika terjadi air pasang besar melalui Ops Air Pasang Besar.

Pengarah Operasi Bomba dan Penyelamat Selangor Mohd Sani Harul berkata, pemantauan dilakukan selama tiga hari berturut-turut itu memfokuskan

kawasan Kuala Selangor, Sabak Bernam dan Tanjung Karang.

"Seramai 1,400 anggota bersama 46 jentera bomba, 40 bot penyelamat dan 18 lori bersiap sedia untuk menghadapi sebarang kemungkinan.

"Ops ini dijalankan selama 24 jam sepanjang tempoh air pasang besar sehingga 18 November ini," katanya.

Sebelum ini, Agensi Angkasa Negara (ANGKASA) dalam satu kenyataan berkata, fenomena Supermoon pada tahun ini adalah yang terbesar.

DR Azizan

